



Investà nov milliuns en la cabina nova

Venderdi passà ha Heinz Schumacher manà la radunanza generala da las Penedicularas da Mustér.

3



L'Italia na po betg sglar

L'Alitalia n'ha anc betg pers las alas, ma insaquantas plimas schon. La societad aviatica da l'Italia è en agonia.

7

DIE SÜDOSTSCHWEIZ

LA QUOTIDIANA

Redacziun: Via centrala 4, 7130 Ilanz/Glion, tel. 081 920 07 10, fax 081 920 07 15

Samedan suot l'insaina da l'ova

■ (anr/mfo) La vschinaunha da Samedan ho organiso düraunt la fin d'eivna passada ils seguonds «Dis da l'ova». Il tema dals duos dis ho tematiso la dumanda: «A chi tuocha l'ova?». Il program dals seguonds Dis da l'ova da Samedan es sto vast: Fats scientifics davart l'ova, discussiuns, referats, modul infurmativ, visitas guidedas, la-

vuors da scolars ed ün'exposiziun ambulanta haun tratto l'exelix da vita in ün möd chi fascinescha ad ün public d'experts taunt scu a quel da laics. I'l center dal dis es steda la «Cited d'ova», la quèla as rechatta auncha per ün pèr dis süin ed in tuorn la Piazza Planta a Samedan.

> PAGINA 9

Dau adia all'Alp dil Crap da Flem



■ (ac) Temps d'atun, temps da scargada. Ina dallas bialas e pli spectacularas scargadas dad in'alp da vaccas el Grischnu ei da perseguitar onn per onn giu dil Crap da Flem. Igl ei l'aschinumnada «Scala teissa» che meina neuagiu entochen Bargis e che porscha ina culissa speciala. La sonda passada han la fumeglia e las 170 vaccas priu la via suttapeis. Accumpignadas da numerus gidonters e benventadas da bia publicum.

FOTO A. CADONAU

> PAGINA 5

Premis per «nouv/as» scripturas e scriptuors

■ (anr/mfo) Ultra da trais premis da promoziun han 10 ulterius «poets» pudü tour incunter da la concorrenza da scriver Pledpiera premis in fuorma da munaida. La premiaziun da las lavuors inoltradas ha gnü lö in sonda a Zernez.

Da totalmaing 208 istorgias inoltradas dad uffants e giuvenils da 10 fin 30 ons ha la giuria da la concorrenza Pledpiera erui ils vendschaders e dat cuntschaint ils noms da quels in occasiun d'üna premiaziun publica. Ils prüms trais da mincha categoria han prelet lur istorgias. In quell'ocasiun s'haja dudi istorgias chi han descrit eveniments persunals, istorgias fantasticas e crimis.

Servetsch d'abunents e da distribuziun: tel. 0844 226 226



> PAGINA 11

Sin comba falombra

La pcd Surselva para pronta da retrer l'iniziativa inoltrada a favur dalla scola da tgira

DAD ANDREAS CADONAU

■ Suenter la discussiun el Parlament regiunal la sonda passada a Flem pari clar. L'iniziativa, lantschada per mantener la Scola da tgira a Glion, vegn probablamein retratga. Motiv che la pcd Surselva vegn a discutir davart ina retratga dall'iniziativa lantschada per mantener ina Scola da tgira Glion ein las stentas dalla Regiun Surselva e dil tgamun dalla scola, Johnny Wehrli, d'instradar ina scola da tgira a Glion sin basa privata. Per quei intent ei vegniu fundau dacuort ina Cuminonza d'interess Scola da tgira a Glion, sco quei che l'«Arena alva» ha rapportau. Denton paran ils representants dalla pcd Surselva sez pauc perschuedi dall'atgna iniziativa. Il president dalla Regiun Surselva, cusseglier nazional Sep Cathomas, ha fatg valer avon il Parlament regiunal il vendergis passau a Flem da veser pauc sustegn per l'iniziativa el cussegl grond. Grondas schanzas da reussir en ina votaziun dil pievel vesa Sep Cathomas aunc



Buca ton perschuedi dall'iniziativa sco a caschun dalla surdada dallas suttascripziuns: Sep Cathomas, Roman Cantieni, Walter Frizzoni che pren encunter las suttascripziuns e Johnny F. Wehrli (da dretg). FOTO N. SIMMEN

meins. Era il deputau regiunal dalla pcd ed in dils iniziants, Roman Cantieni, ei s'exprimius ella medema direzziun. Tonpli eis el

dil meini ch'ei fussi pli convenent da retrer l'iniziativa sche las stentas per lantschar ina scola sin basa privata prospereschien. L'in-

teressenza per ina scola ei alla tscherca d'investurs.

> PAGINA 3

Menhir per Falera – Falera per Menhir

■ (anr/ab) Dapi tschun onns ha il festival da musica Menhir liug a Falera. Duront il concert da giubileum ha il menader artistic Simon Camartin engraziu als da Falera per lur hospitalitad e ludau els per lur generusadad. Ella vischnaunha da Falera rumpa il festival da musica il silenzi denter las stagiuns aultas da stad e d'unviern. Il festival da renum attrai ils hosps da vacanzas e carmala dabiars indigens els lo-

ghens da concert. Sper ils interprets ord las tiaras digl ost seprentan ils musicists indigens. «Nus sespruein da tener igl equiliber denter ils musicists indigens e tals digl exteriur», di Simon Camartin. E gest ils solists indigens – sco per exempel Gion Andrea Casanova cun siu fagot – leventan als Sursilvans las meraviglias per la musica classica

> PAGINA 2



«In fagottist ei in lumpazi.» Aschia ha Simon Camartin annunziu Gion Andrea Casanova. FOTO A. BERTOGG

Blers bels pros

■ (anr/gns) Igl meis da zarcladour e fanadour ò ena giuria piglia sot la marella igls pros aint igl Parc Ela. Per l'amprema gEDA è nia organiso en campiunadi digls pros. 25 pous da Surmeir èn sa participos alla concorrenza ed on annunzgia 52 pros. La giuria ò surtot valeto la gronda diversitad e vurdo quantas ervas e flours tgi creschan sen igls differents pros. Igl experts èn stos surstos digls resultats ed an general dalla fluriziun alpina. Sonda passada èn nias onoros igls pous da Surmeir tgi on igls pi bels pros. A Salouf e Tinizong èn igls pi bels pros digl Parc Ela.



Blers puncts ò la giuria do agls pros cun bleras flours. FOTO G. N. STGIER

> PAGINA 13

Sculars d'Andeer gidan spindrar las balenas

■ (anr/grc) La tearza classa d'Andeer cun la surmestra Ladina Gredig à gl'atun passo andrizzo egn stan da fier a d'infurmaziun segl plaz da la posta ad Andeer. Igl retgav da radund 1100 fràncs a quella classa surdo a l'organisaziun internaziunala par la protezziun digl ambiant «Greenpeace», an favur da las balenas ca en periclitadas. Sut igl num «x-hoch-herz» scriva la

Migros gea da tres ons annà or egna concorrenza par projects da sculars ca s'angaschan par cuncarstgans near par la natira. Sco finiziun digl tema «balena a mar» tracto an l'instrucziun materiala àn igls sculars zambargieu diferaintas robas par vender quellas an favur da las balenas, a quegl cun succzes.

> PAGINA 13



Fa la paretta da derivonza tirolesa en accompignament dalla Svizra centrala.



Numerus gidonters tgamunan la biestga en direcziun da Bargis.



Bein ornada e bein fittada. Quei vala en quei cass ton per la dunna sco per la vacca.

FOTOS A. CADONAU

Descender «La scala teissa»

La scargada dalla Alp dil Crap da Flem attrai dabia publicum

■ (ac) La scargada dalla Alp dil Crap da Flem ei probabel ina dallas pli spectacularas scargadas dad in alp da vaccas el cantun Grischun. La sonda passada ei la muaglia semessa sin via en direcziun Bargis. «Stai si Gion Paul da Flem stai si las vaccas van...», na buca sul Segnas vi, mobein neuagi dil Crap da Flem viers Bargis en direcziun da Flem e quei beinaccompignadas dalla fumeglia, dils purs e da numerus gidonters. Il viadi dallas 170 vaccas bein ornadas ed equipadas cun plumpas e bransinas ha carmalau dabia publicum la sonda passada a Bargis. Inaga pervia dalla via spectaculara «La scala teissa» dalla spunda e preit crap neuagi el plaun da Bargis. Ina scala che porscha al publicum ina unica culissa. Buca che Gion Paul da Flem havess clamau il publicum a Bargis. Igl ei la Televisiun Tüdestga che ha emess avon dus onns da quei liug ed aschia rendiu attent alla scargada da Flem. Il survetsch postal ha stuiiu clamar tut sias reservas da transport per tgamunar ils biebein 1500 aspectaturs a Bargis. Leu nua che la nebla ha formau la sonda passada in'umbriva avon la culissa sco per impedir che la raspada possi veser il viadi dalla biestga. Enviars miezgi cu la muntanera ei semessa en moviment sil Crap da Flem en direcziun Bargis sto il scadanem dallas plumpas haver temen-tau igl umbrival grisch ed el ei untegius per ch'il publicum sepostaus ella planira sappi metter en funcziun l'apparatura digitala. Biestga bein ornada e fumeglia zun fittada e la via extraordinaria han dau la culissa ideala. Per che la muaglia stauschi buc ina l'autra sur la preitcrap

oragiu sto ella vegnir accompignada da passa 30 gidonters che tegnan a mistregn la muntanera sil vial stretg. Gi da scargada vala per in gi da renconuschientscha per fumeglia e puraglia. Negin che taluna da subvenziuns agraras exageradas e schizun ils turisticers tarlischan era sche la biestga tgigerlescha cuntinuadamein per las sendas da viandar e stradals dad ir cun velo da muntogna. Arrivai el «Plaun

dil Stuz» a Bargis nua che la representanza agrara indigena ha envidau a meisa ei vegniu fatg pausa ed ina emprema zavrada. Pausa era per ornar la biestga in'ulteriura ga e per semetter sin via en direcziun da Fidaz e Flem. Cun la scargada va la stad definitivamein da rendiu. E la scargada dalla Alp dil Crap da Flem astgass esser ina dallas davosas scargadas da quei onn.



Senza corna teness quei ornament buc.



L'avanguardia ascenda cun precauziun «La scala teissa».



La biestga fuorma in liung til dalla Scala teissa enagiu.

reclama



DRINK AND DRIVE

Saft vom Fass alkoholfrei ist ein erfrischender Durstlöcher mit nur 21 kcal/dl für unterwegs, in Restaurants, Bars oder zu Hause. Trink den neuen Cider und bewahre einen klaren Kopf.



MÖHL Mosterei Möhl AG
9320 Arbon | Tel. 0041 71 447 40 74 | www.moehl.ch